

- केंद्रीय गृह मंत्री अमित शाह वाइब्रेंट विलेज प्रोग्राम रा दूजा दौर री सरूआत कीनी-इण मांय सरहदी गांवां मांय विकास माथे खास ध्यान दियो जावेला।
- केन्द्रीय मंत्री अश्विनी वैष्णव कह्यो-भारत सेमीकंडक्टर अर इलेक्ट्रॉनिक्स उद्योग मांय अगाड़ी बणबो तैय कीनो।
- राज्य सरकार खाद अर बीज री गुणवत्ता सुनिश्चित करण सारू बेगो ई करड़ो कानून बणावेला।
- भारतीय वायु सेना रा सारंग हैलीकॉप्टरां अर सूर्यकिरण जहाजां रा बेड़ा री ओर ऊँ आज जयपुर मांय हैरतअंगेज करतब बतायी ज्या।

000

केंद्रीय गृह मंत्री अमित शाह आज श्वाइब्रेंट विलेज प्रोग्राम रा दूजा दौर री सरूआत कीनी। ई मौके श्री शाह कह्यो के ई कार्यक्रम रो मकसद अंतरराष्ट्रीय सरहद कने रा गांवां मांय हिफाजत,सड़कां अर सरकारी योजनावां रो पूरो फायदो जनता ताई पूगावणो है।

असम मांय नाथनपुर गांव ऊँ सरू करी ज्या श्वाइब्रेंट विलेज प्रोग्राम रा दूजा दौर मांय छह हजार 839 करोड़ रुपया रा खर्च ऊँ राजस्थान समेत 17 राज्यां रा करीब दो हजार गांवां रो विकास कर्यो जावेला। ई योजना रा तैत 3 सौ 34 ब्लॉक्स मांय विकास रा काम कराया जावेला।

000

भारत अर अमरीका बीचे आज नई दिल्ली मांय इंडिया एआई इम्पैक्ट समित रा तैत पैक्स सिलिका घोषणा-पत्र माथ सही करी ज्या। ओ घोषणा-पत्र खास खनिजां अर सेमीकंडक्टर बणावण अर तेजी ऊँ विकसित व्हे रह्या आर्टिफिशियल इंटेलिजेंस रा हलका मांय एक दूजा री मदद बधावेला। ई मौके इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो के भारत सेमीकंडक्टर अर इलेक्ट्रॉनिक्स उद्योग मांय अगाड़ी बणबो तैय कीनो है। वे कह्यो के भारत रा न्यारा-न्यारा राज्यां मांय विद्यार्थी इलेक्ट्रॉनिक चिप बणा रह्या है।

श्री वैष्णव कह्यो के भारत मांय सेमीकंडक्टर बणावण रो पहलो कारखानो बेगो ई काम सरू करेला।

000

जयपुर मांय आज तीन दिन रो राष्ट्रीय न्यायिक सम्मेलन सरू व्हे रह्यो है। साइबर सुरक्षा-जागरुकता, संरक्षण और न्याय तक पहुंच मुद्दा माथे व्हे रह्यो ओ सम्मेलन राज्य विधिक सेवा प्राधिकरण री ओर ऊँ राख्यो जा रह्यो है। सुप्रीम कोर्ट रा मुख्य न्यायाधीश सूर्यकांत आज सिंज्यां इण रो उद्घाटन करेला। राजस्थान इंटरनेशनल सेंटर मांय राख्या जा रह्या ई सम्मेलन मांय मुख्यमंत्री भजनलाल शर्मा ई सिरकत करेला। सम्मेलन रे दौरान राजस्थान हाईकोर्ट रा कार्यवाहक मुख्य न्यायाधीश संजीव प्रकाश शर्मा री अगुवाई मांय रालसा री केई नुवी पहलां री सरूआत करी जावेला।

000

राज्यपाल हरिभाऊ बागडे ज्ञान, कौशल अर चरित्र ने देश री बरकत री बुनियाद बताता थकां नौजवानां ऊँ देश बणावण रा काम मांय सक्रिय भागीदारी करण बाबत् कह्यो है। वे आज भीलवाड़ा री एक गैर-सरकारी यूनिवर्सिटी रा दीक्षांत समारोह मांय बोल रह्या हा। राज्यपाल कह्यो के मौजूदा दौर मांय बौद्धिक क्षमता अर गुणवत्ता वाळी भणाई-लिखाई रो खास काम है। राज्यपाल खुद रे पाण ऊबा भारत री चर्चा करता थकां कह्यो के देश फौजी साज-ओ-सामान अर भारी मशीनां बणावण रा मामला मांय लगातार खुद रे पाण ऊबो व्हे रह्यो है। जळसा मांय 30 विद्यार्थियां ने सोना रा तमगा अर शोध पूरो करण वाळा 31 जणा ने उपाधियाँ दे र नवाजी ज्या।

000

राज्य मांय बेहतर खाद-बीज मुहैया करावणो तैय करण सारू बेगो ई कानून बणायो जावेला। कृषि मंत्री डॉ. किरोड़ी लाल मीणा आज विधानसभा मांय आ जाणकारी दीनी। वे बतायो के घटिया क्वालिटी रा खाद-बीज मुहैया करावण वाळां ने प्रस्तावित कानून मांय 20 साल री कैद अर 20 लाख रुपया रा जुर्माना री सजा देवण रो प्रावधान व्हेला। कृषि मंत्री कह्यो के राज्य मांय किसानां ने ज़रूरी तादाद मांय

खाद-बीज मुहैया कराया जा रहा है। वे सदन ने बताया के आवता महीना री मांग सारु ई यूरिया अर डी.ए.पी. खाद रो स्टॉक राखी ज्यो है। मंत्री बताया के नकली खाद-बीज अर खाद-बीज री कालाबाजारी रोकण सारु लारला कुछ बरसां मांय 107 एफ.आई.आर. दर्ज करी ज्यो अर 27 कारखाना बंद करा दिया ज्यो। श्री मीणा कह्यो के मौजूदा राज मांय लारला कांग्रेस राज री तुलना मांय खाद री कालाबाजारी रोकण माथे बत्तो ध्यान दे रही है।

000

जयपुर मांय आज जल महल री पाल माथे भारतीय वायु सेना रा सारंग हेलीकॉप्टरों अर सूर्यकिरण जहाजों रा बेड़ा री ओर ऊँ हैरतअंगेज करतब बतायी ज्यो। कमांडिंग ऑफिसर अभिजीत री अगुवाई मांय पांच सारंग हेलीकॉप्टरों री टीम आसमान मांय केई आकृतियां बना र देखण वाळां रो मन मोह लीनो। ई दौरान पांच हेलीकॉप्टरों रो सटीक तालमेल निजर आयो। कम ऊंचाई माथे संतुलित उड़ान, आमी-सामी एक-दूजा रे करीब ऊँ निकळबो अर सिंक्रोनाइज्ड मूवमेंट निरखण वाळां ने घणा राजी कर दीना। ई पाछे सूर्यकिरण टीम रा जहाज आकाश मांय तिरंगा धुआ छोड़ता थकां प्रदर्शन री सरुआत कीनी। जहाजों रा अ करतब देखण सारु जनता सागे देशी-परदेशी सैलाणी ई मोटी तादाद मांय पूग्या। लोग ओ कार्यक्रम 22 फरवरी ने ई देख सकेला।

000

कोटा रा चम्बल रिवर फ्रंट माथे काल कोटा महोत्सव सरु व्हेला। दो दिन रा ई उत्सव मांय भांत-भांत रा सांस्कृतिक, खेल अर कारोबारी कार्यक्रम राख्या जावेला। महोत्सव री सरुआत गोदावरी धाम माथे गणेश वंदना सागे व्हेला। ई रा तैत रिवर फ्रंट रा न्यारा-न्यारा घाटां माथे शकोटा दंगलश, रोजगार मेळा अर मोटा अनाज ऊं बनायी ज्यो, खाण-पीण री चीजां री प्रदर्शनी लगायी जावेला। दीतवार ने हेरिटेज वॉक निकाळी जावेला। सिंज्यां री पोर चम्बल नदी री महाआरती करी जावेला अर कोटा डोरिया फैशन शो राख्यो जावेला। ई मौके लोकसभा अध्यक्ष ओम बिरला जनता ने शुभकामनावां देता थकां कह्यो के महोत्सव रे दौरान कोटा री संस्कृति रो दरसाव कर्यो जावेला। वे कह्यो के कोटा डोरिया फैशन शो सरीखा आयोजनां ऊं वटे रा बुनकरां रा हुनर ने नुवी पिछाण अर मोटो बाजार मिलेला। वे कह्यो के ई महोत्सव रे ज़रिये हाड़ौती हलका मांय सैलाणियां री आमद बधेला।

000

सीकर जिला रो नामी खाटूश्याम जी रो फागण मेळो काल सरु व्हेला। मेळा मांय मोटी तादाद मांय आवण वाळां जातरुआं रा सुबीता ने ध्यान राखता थकां खास इन्तजाम करी ज्यो है। खाटूश्याम-रींगस गेला माथे मोटर गाड़ियां नी ले जायी जा सकेला। खाटूश्याम जी मेळा अर होळी रा त्यौहार ने ध्यान राखता थकां उत्तर पश्चिम रेलवे री ओर ऊँ केई खास गाड़ियां चलायी जा रही है।

000

प्रदेश मांय आवता सप्ताह मौसम सूखो रेहवण रा आसार है। मौसम विज्ञान केंद्र जयपुर रा निदेशक राधेश्याम शर्मा बताया के आवता तीन-चार दिन कम-ती-कम तापमान मांय खास बदलाव रा आसार नी है।

000

पाली रा गळी कूचां मांय सामान बेचण वाळां ने प्रधानमंत्री स्वनिधि योजना रा तैत लगाया जा रह्या शिविरां रे मार्फत आसान कर्ज मुहैया कराया जा रह्या है। 27 फरवरी तांई चालण वाळा आ शिविरां मांय बैंकां रे ज़रिये कर्ज सागे ई प्रधानमंत्री सुरक्षा बीमा योजना, जन-धन योजना अर **एक राष्ट्र एक राशन कार्ड** सरीखी केई योजनावां रो फायदो दियो जा रह्यो है। स्वनिधि योजना रो फायदो लेवण वाळा नरेंद्र कुमार बताया के ई शिविर ऊँ स्ट्रीट वेंडर्स ने बधावो मिल रह्यो है।

000

प्रधानमंत्री नरेन्द्र मोदी 22 फरवरी, दीतवार ने आकाशवाणी ऊँ प्रसारित कर्या जावण वाळा खास कार्यक्रम "मन की बात" मांय विचार बतावेला। आ हर महीना प्रसारित कर्या जावण वाळा ई कार्यक्रम री 131वीं कड़ी व्हेला। ओ कार्यक्रम संवारे 11 बज्यां आकाशवाणी अर दूरदर्शन रा पूरा नेटवर्क माथे प्रसारित कर्यो जावेला।

0000